

摘藻堂四庫全書薈要

史部

欽定四庫全書薈要卷五千五百十九

舊五代史卷一百十八

宋門下侍郎參知政事監修國史薛居正等撰

周書第九

世宗紀五

顯德五年春正月癸未朔帝在楚州城下從臣詣行宮

稱賀

隆平集馬仁稱傳世宗征淮南登楚州永憲飛樓距城百步城卒罵左右射莫能及召仁稱至應莊

而乙酉降同州為郡右驍衛將軍王環卒丙戌右龍武

將軍王漢璋奏攻海州戊子詔諸道募職州縣官竝以
三周年為考限閏月不在其內州府不得差攝官替正
官云己丑詔侍衛馬軍都指揮使韓令坤權知揚州軍
用事庚寅發楚州管內丁壯開鵲河以通運路乙巳帝
親攻楚州時今上在楚州城北晝夜不解甲胄親冒矢
石麾兵以登城丙午拔之斬偽守將張彥卿等六軍大
掠城內軍民死者萬餘人廬舍焚之殆盡

陸游南唐書
張彥卿傳云

保大末周世宗南侵彥卿為楚州防禦使周師銳甚旬
日間海泰州靜海軍皆破元宗亦命焚東都官寺民廬

從其民渡江世宗親御旗鼓攻楚州自城以外皆已下
發州民滑老鵲河遣齊雲戰艘數百自淮入江勢如震
霆烈焰彥卿獨不為動及梯衝臨城鑿城為窟室置城
而焚之城皆摧圯遂陷彥卿猶結陣城內誓死奮擊謂
之巷闕日暮轉至州廨長短兵皆盡彥卿猶取繩床搏
戰及兵馬都監鄭昭業等千餘人皆死之無一人生降
者周兵死傷亦甚衆世宗怒盡屠城中居民焚其室廬
然得彥卿子光祐不殺也又趙鼎臣竹隱畸士集云當
城中之危也彥卿方與諸將立城上因泣諫以周唐強
弱勢不足以相支又城危甚而外無一人援恐旦夕徒
死無益勸彥卿趣降彥卿領之因顧諸將指曰視彼諸
將方同顧彥卿則抽劍斷其子首擲諸地慷慨泣謂諸
將曰此彥卿子勸彥卿降周彥卿受李家厚恩誼不降
此城吾死所也諸軍欲降任降第勿勸我勸我者同此
貽矣于是諸將愕
貽亦泣莫敢言降

二月甲寅偽命天長軍使易贇以城

歸順戊午車駕發楚州南巡丁卯駐蹕于廣陵詔發揚

州部內丁夫萬餘人城揚州帝以揚州焚盪之後居民

南渡遂于故城內就東南別築新壘戊辰遣使祭故淮

南節度使楊行密故昇府節度使徐溫等墓癸酉幸揚

子渡觀大江乙亥黃州刺史司超奏破淮賊三千人擒

偽舒州刺史施仁望丙子隰州奏河東賊軍遁時劉

鈞聞帝南征發兵圍隰州巡檢使李謙溥以州兵拒之

而退

東都事畧楊廷璋傳隰州闕守乃請監軍李謙溥攝州事謙溥至隰并人來圍其城或請速救之廷

瑋曰賊遠至必未攻城乃募死士百餘人潛諭譚溥相應夜衝拔擊之并人大潰透北數十里又李譚溥傳云
隰州閼守譚溥攝州事至則濟城隍嚴兵備未旬日而
并人至方賊暑譚溥服絺綌揮羽扇引二小吏登城徐
步并人望之
勒兵不敢動
三月壬午朔幸泰州丁亥復幸廣陵辛卯

幸迦鑾江口遣右武衛大將軍李繼勳率舟師至江島
以觀寇癸巳帝臨江望見賊船數十艘命今上帥戰棹
以追之賊軍退去今上直抵南岸焚其營柵而迴甲午
以右武衛大將軍李繼勳為左領軍上將軍乙未殿前
都虞候慕容延釗奏大破賊軍于東沛州丙申江南李景

遣其臣兵部侍郎陳覺奉表陳情兼貢羅縠紬絹三千匹乳茶三千斤及香藥犀象等覺至行在覩樓船戰棹已泊于江岸以為自天而降愕然大駭丁酉高保融奏本道舟師已至鄂州戊戌兩浙錢俶奏差發戰棹四百艘水軍萬七千人已泊江岸請師期已亥今上率水軍破賊船百餘隻于瓜步是日李景遣其臣劉承遇奉表以廬舒蘄黃等四州來獻且請以江為界帝報曰皇帝恭問江南國主使人至省奏請分割舒廬蘄黃等州

畫江為界者頃逢多事莫通玉帛之歡適自近年遂構
干戈之役兩地之交兵未息蒸民之受弊斯多一昨再
辱使人重尋前意將敦久要須盡縷陳今者承遇爰來
封函復至請割州郡仍定封疆猥形信誓之辭備認始
終之意既能如是又何復求邊陲頓靜于煙塵師旅便
還于京闕永言欣慰深切誠懷其常潤一路及沿江兵
棹今已指揮抽退兼兩浙荆南湖南水陸兵士各令罷
兵其廬黃蘄三路將士亦遣抽拔近內候彼中起揭逐

處將員及軍都家口丁畢祇請差人勾喚在彼將校交割州城云淮南平凡得州十四縣六十戶二十二萬六千五百七十四先是李景以江南危蹙謀欲傳位于世子使附庸于我故遣陳覺上表陳叙至是帝以既許其通好乃降書以答之曰別觀來章備形緝旨叙此日傳讓之意述向來高尚之懷仍以數歲已還交兵不息備論追悔之事無非尅責之辭雖古人有引咎責躬因災致懼亦無以過此也况君血氣方剛春秋甚富為一方之

英主得百姓之歡心卽今南北才通疆場甫定是玉帛
交馳之始乃干戈載戢之初豈可高謝君臨輕辭世務
與其慕希夷之道曷若行康濟之心重念天災流行分
野常事前代賢哲所不能逃苟盛德之日新則景福之
彌遠勉修政理勿倦經綸保高義于初終垂遠圖于家
國流芳貽慶不亦美乎庚子詔曰比者以近年貢舉頗
是因循頻詔有司精加試練所冀去留無濫優劣昭然
昨據貢院奏今年新及第進士等所試文字或有否臧

爰命辭臣再令考覆庶涇渭之不雜免玉石之相參其

劉坦戰貽慶李頌徐緯張觀等詩賦稍優宜放及第王

汾據其文辭亦未精當念以頃曾剝落將與成名熊若

谷陳保衡皆是遠人深可嗟念亦放及第郭峻趙保雍

楊丹安玄度張昉董咸則杜思道等未甚苦辛竝從退

黜更宜修進以俟將來知貢舉右諫議大夫劉濤選士

不當有失用心責授右贊善大夫俾令省過以戒當官

先是濤于東京放榜後引新及第進士劉坦已下一十

五人赴行在帝命翰林學士李昉覆試故有是命壬寅
復幸揚州改廬州軍額為保信軍甲辰以右龍武統軍
趙贊為廬州節度使以殿前都虞候慕容延釗為淮南
節度使兼殿前副指揮使遣鹽城監使申屠諤齋書及
御馬一十匹金銀銜全散馬四十匹羊千口賜江南李景
諤先為王師所俘故遣之丙午江南李景遣所署宰相
馮延巳獻犒軍銀十萬兩絹十萬匹錢十萬貫茶五十
萬觔米麥二十萬石庚戌詔故淮南節度使楊行密故

昇府節度使徐溫各給守冢戶應江南臣寮有先代墳墓在江北者委所在長吏差人檢校辛亥李景遣所署臨汝郡公徐遼進買宴錢二百萬并遣伶官五十人與遼俱來獻壽觴夏四月癸丑宴從臣及江南進奉使馮延巳等于行宮徐遼代李景捧壽觴以獻進金酒器御衣犀帶金銀錦綺鞍馬等乙卯車駕發揚州還京丙辰太常博士權知宿州軍州事趙礪除名坐推劾弛慢也先是翰林醫官馬道玄進狀訴壽州界被賊殺却男獲

正賊見在宿州本州不為勘斷帝大怒遣端明殿學士
竇儀乘驛往按之及獄成生族死者二十四人儀奉辭
之日帝旨甚峻故儀之用刑傷于深刻戊午以前延州
留後李彥願為滄州留後庚申新太廟成遷五神主入
于其室壬申至自淮南癸酉命宣徽北院使咎居閏判
開封府事甲戌澶州節度使張永德準詔赴北邊以契
丹犯境故也丁丑兩浙奏四月十九日杭州火廬舍府
署焚燒殆盡五月辛巳朔上御崇元殿受朝伏衛如式

詔侍衛諸軍及諸道將士各賜等第優給應行營將士歿
于王事者各與贈官親的子孫竝量才錄用傷夷殘廢
者別賜救接淮南諸州及徐宿宋亳陳潁許蔡等州所
欠去年秋夏稅物竝與除放云丙戌命端明殿學士竇
儀判河南府兼知西京留守事辛卯以襄州節度使安
審琦為青州節度使以許州節度使韓通為宋州節度
使依前兼侍衛馬步都虞候以宋州節度使向訓為襄
州節度使以今上為忠武軍節度使依前殿前都指揮

使淮南之役今上之功居最及是命之降雖云酬勲止

于移鎮而已賞典太輕物議不以為允癸巳以左武衛

上將軍武行德為鄜州節度使以右神武統軍宋延渥

為滑州節度使

小畜集宋延渥神道碑云五月授義成軍節度使其制畧曰長驅下瀨之師若

涉無人之境除凶戢難爾既立夫殊庸厲岳盟河予宜忘于豐報南燕舊邦北闕伊通河端作翰遶臨白馬之

津獲下統戎卽鎮卧龍之地

以前同州留後王暉為相州留後乙未

立東京羅城諸門名額東二門曰寅寅延春南三門曰

朱明景風畏景西二門曰迎秋肅政北三門曰玄德長

景愛景辛丑幸懷信驛乙巳詔在朝文資官各再舉堪
為幕職令錄一人戊申以襄州節度使何訓兼西南面
水陸發運招討使己酉以太府卿馮延魯充江南國信
使以衛尉少卿鍾謨為副賜李景御衣玉帶錦綺羅縠
帛共十萬匹金器千兩銀器萬兩御馬五匹金玉鞍轡
全散馬百匹羊三百匹賜江南世子李弘冀器幣鞍馬
等別賜李景書曰皇帝恭問江南國主煮海之利在彼
海濱屬疆壤之初分慮供食之有闕江左諸郡素號繁

饒然于川澤之間舊無斥鹵之地曾承素旨常在所懷
願均收積之餘以助軍旅之用已下三司逐年支撥供
軍食鹽三十萬石又賜李景今年厯日一軸六月庚午
命中書舍人竇儼參定雅樂辛未赦先俘獲江南兵士
四千七百人歸本國壬申有司奏御膳料上批曰朕之
常膳今後減半餘人依舊癸酉禘于太廟乙亥兵部尚
書張昭等撰太祖實錄三十卷成上之賜器帛有差丁
丑以中書舍人張正為工部侍郎充江北諸州水陸轉

運使戊寅詔諫議大夫宜依舊為正五品上仍班在給事中之下癸未以右散騎常侍高防為戶部侍郎以左驍衛上將軍李洪信為右龍武統軍以左領軍上將軍李繼勲為右羽林統軍以工部尚書田敏為太子少保以刑部侍郎裴巽為尚書左丞以左武衛上將軍薛懷讓為太子太師以右羽林大將軍李萼為右千牛衛上將軍自敏已下皆致仕丙戌中書門下新進冊定大周刑統奉勅班行天下丁亥賜諸道節度使刺史均田圖

各一面唐同州刺史元稹在郡日奏均戶民租賦帝因覽其文集而善之乃寫其辭為圖以賜藩郡時帝將均定天下賦稅故先以此圖徧賜之

五代會要載原詔云朕以寰宇雖安庶民

未泰當乙夜觀書之際較前賢早俗之方近覽元稹長慶集見在同州時所上均田表較當時之利病曲盡其情俾一覽之生靈咸受其賜傳于方冊可得披尋因令製素成圖直書其事庶王公觀覽觸目驚心利國便民無亂條制昔經合道盡繫變通但要適宜所冀濟務翳乃勛舊共庶黎元今賜元稹所奏均田圖一面至可領

也

閏月壬子廢衍州為定平縣廢武州為潘原縣壬戌

河決河陰縣溺死者四十二人辛丑幸新授青州節度

使安審琦第癸酉邢州留後陳思讓奏破河東賊軍千
餘人于西山下斬首五百級八月庚辰延州奏澁溪水
漲壞州城溺死者百餘人已丑太子太師致仕宋彥筠
卒辛丑江南李景上表乞降詔書不允九月丁巳以太
府卿馮延魯為刑部侍郎以衛尉少卿鍾謨為給事中
竝放歸江南時延魯鍾謨自江南復命李景復癸欲傳
位于其世子弘冀帝亦以書答之甲子賜江南羊萬口
馬三百匹橐駝三十頭賜兩浙錢俶羊五千口馬二百

匹索馳二十頭乙丑賜宰臣樞密使及近臣宴于玉津

園已巳占城國王釋利因德漫遣使貢方物壬申天清

節羣臣詣廣德殿上壽江南進奉使商宗義代李景捧

壽觴以獻

宋類苑云湯悅父殷舉唐末有才名本名宗義建隆初避宣祖諱改姓湯初在吳為舍人

受詔撰揚州李先寺碑世宗親往駐驛此寺詩其文賞
歎及畫江議定後主遣悅入貢世宗為之加禮自淮上
用兵凡書詔多悅之作持為典瞻扣于事情世宗每覽
江南文字形于嗟嘆當時沈過馬士元皆不稱職後用
陶穀李昉于舍人其冬十月巳卯以戶部侍郎高防為
後用扈載率由此也

西南面水陸轉運使將用師于巴邛故也

宋史高防傳世宗謀伐蜀

以防為西南面水陸轉運制置使
屢發蜀糧赴鳳州為征討之備

丙戌邠州李暉移鎮

鳳翔戊子幸迎春苑己丑太常卿司徒詡以本官致仕

壬辰帝狩于近郊癸巳前相州節度使王饒卒甲午左

監門上將軍許文鎮右千牛上將軍遣鎬衛尉卿周延

構竝歸江南乙未詔淮南諸州鄉軍竝放歸農丁酉遣

左散騎常侍艾穎等均定河南六十州稅賦

五代會要
載賜諸道

均田詔曰朕以干戈既列寰海漸寧言念地

租額竝行均定所冀永遠重輕卿受任方隅深窮治本

必類副寡昧平分之意察卿間治弊之原明示條章用
分寄任所令集事允屬推公今差使臣往彼檢括餘從

別勅

十一月丁未朔詔翰林學士竇儼集文學之士撰集
大周通禮大周正樂從儼之奏也辛亥日南至帝御崇
元殿受朝賀仗衛如式己未昭義李筠奏破遼州長清
皆獲偽命磁州刺史李再興甲子帝狩于近郊十二月
丁丑朔朗州秦醴陵縣玉仙觀山門中舊有田二萬頃
久為山石閉塞今年七月十七日夜暴雷劈開其路復
通己卯楚州兵馬都監武懷恩棄市坐擅殺降軍四人
也丙戌詔重定諸道州府幕職令錄佐官料錢其州縣

官俸戶宜停已丑楚州防禦使張順賜死生在任隱落
權稅錢五十萬官絲綿二千兩也壬辰詔兩京及五府
少尹司參軍各省一員六曹判司內祇直戶法二曹餘
及諸州觀察支使兩番判官並省甲子帝狩于近郊乙
未鄧州劉重進移鎮邠州滑州宋延渥移鎮鄧州以前
河中節度使王仁鎬為邢州節度使以邢州留後陳思
讓為滑州留後己亥詔翰林學士今後逐日起居當直
者仍赴晚朝是月江南李景殺其臣偽太傅中書令宋

齊邱偽兵部侍郎陳覺偽鎮南軍節度副使李徽古等
初帝之南征也吳人大懼覺與徽古皆齊邱門人因進
說于景請委國事于齊邱景繇是衡之及吳人遣鍾謨
李德明奉表至行在帝尋遣德明復命于金陵德明因
說李景請割江北之地求和于我而陳覺李徽古等以
德明為賣國請戮之景遂殺德明及江南內附帝放鍾
謨南歸謨本德明之黨也因譖齊邱等故齊邱等得罪
放齊邱歸九華山覺等貶官尋竝害之景既誅齊邱等

令鍾謨劉闕具言其事故書

舊五代史卷一百十八

舊五代史卷一百十八攷證

周世宗紀五丙戌右龍武將軍王漢璋奏攻海州 案
通鑑作丁亥王漢璋奏克海州歐陽史亦作丁亥取
海州是書祇載丙戌攻海州而不載取城之日疑有
闕文

丙午拔之 案歐陽史通鑑俱作丁未克楚州與是書
異五代春秋從是書作丙午

天長軍使易贇 易贇通鑑作易文贇

乙未殿前都虞候慕容延釗奏大破賊軍于東沛州
案通鑑作甲午延釗奏大破唐兵于東沛州與是書
異日

舊五代史卷一百十八攷證

欽定四庫全書薈要卷五千五百二十

舊五代史卷一百十九

宋門下侍郎參知政事監修國史薛居正等撰

周書第十

世宗紀六

顯德六年春正月丁未朔帝御崇元殿受朝賀仗衛如
式壬子高麗國王王昭遣使貢方物己卯以翰林學士
中書舍人申文炳為左散騎常侍辛酉女真國遣使貢

獻壬戌青州奏節度陳王安審琦為部曲所殺乙丑賜

諸將射於內鞠場戊辰幸迎春苑甲戌詔每年新及第

進士及諸科開喜宴宜令宣徽院指揮排比乙亥詔禮

部貢院今後及第舉人依逐科等第定人數姓名並所

試文字奏聞候勅下放榜云是月樞密使王朴詳定雅

樂十二律旋相為宮之法並造律準上之詔尚書省集

百官詳議亦以為可語在樂志二月庚辰發徐宿宋單

等州丁夫數萬濬汴河甲申發滑亳二州丁夫濬五丈

河東流於定陶入于濟以通青鄆水運之路又疏導蔡河以通陳潁水運之路乙酉詔諸道應差攝官各支半俸丙戌以翰林學士承旨尚書兵部侍郎陶穀為尚書吏部侍郎充職詔升湖州為節鎮以宣德軍為軍額以湖州刺史錢僊為本州節度使從兩浙錢俶之請也辛丑幸迎春苑甲辰右補闕王德成責授右贊善大夫坐舉官不當也詔賜諸道州府供用糧草有差三月庚申樞密使王朴卒甲子詔以北境未復取此月內幸滄州

以宣徽南苑使吳延祚為權東京留守判開封府事以

宣徽北院使咎居潤為副使以三司使張美為大內都

部署

東都事畧張美傳世宗北征以美為大內都點檢

命諸將各領馬步諸軍

及戰棹赴滄州已巳濠州奏鍾離縣饑民死者五百九

十有四癸酉詔廢諸州銅魚

五代會要顯德六年勅諸道牧守每遇除移特降制

書何假符畀其請納銅魚宜廢之

甲戌車駕發京師四月辛卯車駕次

滄州以前左諫議大夫薛居正為刑部侍郎是日帝率

諸軍北征壬辰至乾寧軍偽寧州刺史王洪以城降丁

酉駕御龍舟率舟師順流而北首尾數十里辛丑至益

津關

通鑑至益津關契丹守將終廷暉以城降

自此以西水路漸隘舟師難

進乃捨舟登陸壬寅宿於野次時帝先期而至大軍未

集隨駕之士不及一旅賴今上率材官騎士以衛乘輿

癸卯今上先至瓦橋關偽守將姚內斌以城降

隆平集姚內斌

平州人也世宗北征將兵至瓦橋關內斌為關使開門請降世宗以為汝州刺史

甲辰鄭州刺

史劉楚信以州來降五月乙巳朔帝駐驛于瓦橋關侍

衛親軍都指揮使李重進及諸將相繼至行在瀛州刺

史高彥暉以本城歸順闕南平凡得州三縣十七戶一

萬八千三百六十是役也王師數萬不亡一矢邊界城

邑皆望風而下丙午帝與諸將議攻幽州諸將皆以為

未可帝不聽是夜帝不豫乃止戊申定州節度使孫行

友奏攻下易州擒偽命刺史李在欽來獻斬于軍市乙

酉以瓦橋關為雄州

宋史陳思讓傳得瓦橋關為雄州思讓為都部署率兵戍守

以

益津關為霸州

宋史韓令坤傳為霸州都部署率所部兵戍之

是日先鋒都指

揮使張藏英破契丹數百騎于瓦橋關北攻下固安縣

詔發濱棣二州丁夫城霸州庚戌遣侍衛都指揮使李
重進率兵出土門入河東城界壬子車駕發雄州還京
泉州節度使留從効遣別駕王禹錫奉貢于行在帝以
泉州比臣江南李景方歸奉國家不欲奪其所屬但錫
詔褒美而已丁卯西京奏太常卿致仕司徒詔卒己巳
侍衛都指揮使李重進奏破河東賊軍于百井斬首二

千級甲戌上至自雄州

却掃編周世宗既定三關遇疾而退至澶淵遲留不行雖宰輔

近臣問疾者皆莫得見中外恟懼時張永德為澶州節度使永德尚周太祖之女以親故獨得至卧内于是羣

臣因永德言曰天下未定根本空虛四方諸侯惟幸京師之有變今澶汴相去甚邇不速歸以安人情顧憚旦夕之勞而遲回于此如有不可諱奈宗廟何永德然之承間為世宗言如羣臣旨世宗問誰使汝為此言永德對以羣臣之意皆願為此世宗熟思久之嘆曰吾固知汝必為人所教獨不喻吾意哉然觀汝之窮薄惡足當此即日趣

駕歸京師

六月乙亥朔潞州李筠奏攻下遼州獲偽刺

史張丕旦丙子以皇女薨輟朝三日戊寅鳳翔奏節度使李暉卒鄭州奏河決原武詔宣徽南院使吳延祚發近縣丁夫二萬人以塞之庚辰命宣徽北院使咎居潤判開封府事晉州節度使楊廷璋奏率兵入河東界招

降堡砦一十三所癸未立魏王符彥卿女為皇后仍令
所司擇日備禮冊命以王長子宗訓為特進左衛上將
軍封梁王以第二子宗讓為左驍衛上將軍封燕國公
賜江南進奉使李從善錢二萬貫絹二萬匹銀一萬兩
賜兩浙進奉使吳延福錢三千貫絹五千匹銀器三千
兩丁亥以前青州節度使李洪義為永興軍節度使永
興軍節度使王彥超移鎮鳳翔戊子潞州部送所獲遼
州刺史張丕旦等二百四十五人以獻詔釋之己丑宰

臣范質王溥竝參知樞密院事以樞密使魏仁溥為中書侍郎平章事集賢殿大學士依前充樞密使以宣徽南院使吳延祚為樞密使行左驍衛上將軍以宋州節度使傅衛都虞候韓通為侍衛親軍副都指揮使加檢校太尉同平章事澶州節度使兼殿前都點檢駙馬都尉張永德落軍職加檢校太尉同平章事以今上為殿前都點檢加檢校太傅依前忠武軍節度使帝之北征也凡供軍之物皆令自京遞送行在一日忽于地中得

一木長二三尺如人之揭物者其上卦全題云點檢做

觀者莫測何物至是今上始受點檢之命明年春果自
此職以副人望則點檢做之言乃神符也辛卯以宣徽

北院使判開封事咎居潤為左領軍上將軍充宣徽南

院使以三司使左領衛大將軍張美為左監門衛上將

軍充宣徽北院使判三司

東都事畧張美傳美少為三司小吏澶州糧料使世宗鎮

澶州每有求取美悉力應之及即位連歲征討糧餽無乏美之力也然每思澶州所為終不如公忠待之癸

巳帝崩于萬歲殿聖壽三十九甲午宣遺制梁王于柩

前即皇帝位服紀月日一依舊制是日羣臣奉梁王即位于殿東楹中外發哀其年八月翰林學士判太常寺事實儼上諡曰睿武孝文皇帝廟號世宗十一月壬寅朔葬于慶陵宰臣魏仁浦撰諡冊文王浦撰哀冊文云

五代史補世宗在民間嘗與鄴中大商頡跌氏忘其名往江陵販賣茶貨至江陵見有卜者王處士其術如神世宗頡跌氏同往問焉方布卦忽有一著躍火卓然而立卜者大驚曰吾家筮法十餘世矣常記曾祖以來遺言凡卜筮而著自躍而出者其人貴不可言況又卓立不倒得非為天下之主乎遽起再拜世宗雖佯為詰責而私心甚喜于逆旅中夜置酒與頡跌氏半酣戲曰王處士以我當為天子若一旦到此足下要何官請言之

頡跌氏曰某三十年作估來未有不由京洛者每見稅官坐而獲利一日所入可以敵商賈數月私心羨之若大官為天子某願得京洛稅院足矣世宗笑曰何望之卑耶及承郭氏之後踐祚頡跌猶在召見竟如初言以與之世宗之征東也駐蹕于高平劉崇兼契丹之衆來迎戰時帥多持兩端而王師不利親軍帥樊愛能等各退血世宗赫怒躍馬入陣引五十人直衝崇之牙帳崇方張樂飲酒以示閒暇及其奄至莫不驚駭失次世宗因以奮擊遂敗之追奔于城下凱旋駐蹕潞州且欲出其不意以誅退血者乃置酒高會指樊愛能等數人責之曰汝輩皆累朝宿將非不能用兵者也然退血者無他誠欲將寡人作物貸賣與劉崇爾不然何寡人親戰而劉崇始敗耶如此則卿等雖萬死不足以謝天下宜其曲膝引頸以待斧誅言訖命行刑壯士擒出皆斬之于是立功之士以次行賞自行伍拔于軍廂者甚衆其恩威並著皆此類也初劉崇求援于契丹得騎數千

及觀世宗兵少悔之曰吾觀周師易與爾契丹之衆宜勿用但以我軍攻戰自當萬全如此則不惟破敵亦足使契丹見而心服一舉而有兩利兵之機也諸將以為然乃使人謂契丹主將曰柴氏與吾主客之勢不煩足下餘不敢請勒兵登高觀之可也契丹不知其謀從之洎世宗之陣也三軍皆賈勇爭進無不一當百契丹望而畏之故不救而崇敗論者曰世宗患諸將之難制也久矣思欲誅之未有其轡高平之役可謂天假故其斬決而無貸焉自是姑息之政不行朝廷始尊大自非英主其孰能為之哉世宗既下江北駐蹕于建安以書召偽主主惶恐命鍾謨李德明為使以見世宗德明素有詞辯以利害說世宗使罷兵世宗且知之乃盛陳兵師排旗幟戈戟為門頃道以湊御然後引德明等入見世宗謂之曰汝江南自以為唐之後衣冠禮樂世無比何故與寡人隔一帶水更不發一使奉書相問惟泛海以通契丹舍華事夷禮將安在今又聞汝以詞說寡人罷

兵是將寡人比六國時一羣痴漢何不知人之甚也汝慎勿言當速歸報汝主令徑來跪寡人兩拜則無事矣不然則寡人須看金陵城借府庫以犒軍汝等得無悔乎於是德明等戰懼不能措一辭即日告歸及見偽主具陳世宗英烈之狀恐非四方所能敵偽主計無所出遂上表服罪且乞保江南之地以奉宗廟修職貢其詞甚哀世宗許之因曰叛則征服則懷寡人之心也于是遣使者齎書安之然後凱還論者以世宗加意于江南不獨臨之以威抑以諭之以禮可謂得大君之體矣陳搏陝西人能為詩素舉不第慨然有塵外之趣隱居華山自是其名大振世宗之在位也以四方未服思欲牢籠英傑且以搏曾踐塲屋不得志而隱必有奇才遠畧于是召到闕下拜左拾遺搏不就堅乞歸山世宗許之未幾賜之書勅陳搏朕以汝高謝人寰栖心物外養太浩自然之氣應少微處士之星既不屈于王侯遂甘隱于岩壑樂我中和之化慶乎下武之期而能遠涉山

涂暫來城闕決旬延遇弘益居多白雲暫駐于帝鄉好
爵難縻于達士昔堯唐之至聖有巢許為外臣朕雖寡
薄庶遵前鑒恐山中所闕已今華州刺史每事供須乍
反故山履茲春序緬懷高尚當適所宜故茲撫問想宜
知悉即陶穀之詞也初搏之被召嘗為詩一章云草澤
吾皇詔圖南搏姓陳三峰十年客四海一閒人世態從
來薄詩情自得真超然居物外何必使為臣好事者欣
然謂之答詔詩世宗以張昭遠好古直甚重之因問
曰朕欲一賢相卿試為言朝廷誰可昭遠對曰以臣所
見莫若李濤世宗常薄濤之為人聞昭遠之舉甚驚曰
李濤本非重厚朕以為無大臣體卿首舉此何也昭遠
曰陛下所聞止名行曾不聞才畧如何耳且濤事晉高
祖曾上疏論邠州節度使張彥澤蓄無君心宜早圖之
不然則為國患晉祖不納其後契丹南侵彥澤果有中
渡之變晉社殲焉先帝潛龍時亦上疏請解其兵權以
備非常之變少主不納未幾先帝遂有天下以國家安

危未兆間濤已先見非賢而何臣所首舉之者正為此也世宗曰今卿言甚公然此人終不可于中書安置居無何濤亦卒濤為人不拘禮法與弟澣雖甚雍睦然聚話之際不典之言往往間作澣娶禮部尚書竇寧固之女年甲稍高成婚之夕竇氏出參濤輒望塵下拜澣驚曰大哥風狂耶新婦參阿伯豈有答禮儀濤應曰我不風只將謂是親家母澣且慙且怒既坐竇氏復拜濤又叉手當胸作歇後語曰慙無竇建繆作梁山喏喏時聞者莫不絕倒凡濤于閨門之內不存禮法也如此世宗以為無大臣體不復任用宜哉世宗志在四方常恐運祚速而功業不就以王朴精究術數一旦從容問之曰朕當得幾年對曰陛下用心以蒼生為念天高聽卑自當蒙福臣固陋輒以所學推之三十年後非所知也世宗喜曰若如卿言寡人當以十年開拓天下十年養百姓十年致太平足矣其後自瓦橋關回戈未到闕而晏駕計在位止及五年餘六箇月五六乃三十之成

數也蓋朴婉而言之世宗末年大舉以取幽州契丹聞其親征君臣恐懼沿邊城壘皆望風而下凡番部之在幽州者亦連宵遁去車駕至瓦橋關探邏是實甚喜以為大勲必集登高阜因以觀六師頃之有父老百餘輩持牛酒以獻世宗問曰此地何名對曰歷世相傳謂之病龍臺默然遽上馬馳去是夜聖體不豫翌日病亟有詔曰戈未到關而晏駕先是世宗之在民間已常夢神人以大傘見遺色如鬱金加道經一卷其後遂有天下及瓦橋不豫之際復夢向之神人來索傘與經夢中還之而驚起謂近侍曰吾夢不祥豈非天命將去耶遂召大臣戒以後事初幽州聞車駕將至父老或有竊議曰此不足憂且天子姓柴幽州為燕燕者亦烟火之謂也柴入烟火不利之兆安得成功卒如其言

史臣曰世宗頃在仄微尤務韜晦及天命有屬嗣守鴻

業不日破高平之陣逾年復秦鳳之封江北燕南取之
如拾芥神武雄畧乃一代之英主也加以留心政事朝
夕不倦摘伏辯姦多得其理臣下有過必面折之常言
太祖養成二王之惡以致君臣之義不保其終故帝駕
馭豪傑失則明言之功則厚賞之文武參用莫不服其
明而懷其恩也所以仙去之日遠近號慕然稟性傷于
太察用刑失于太峻及事行之後亦多自追悔逮至末
年漸用寬典知用兵之頻併憫黎民之勞苦蓋有意于

康濟矣而降年不永美志不就悲夫

舊五代史卷一百十九

欽定四庫全書薈要卷五千五百二十一

舊五代史卷一百二十

宋門下侍郎參知政事監修國史薛居正等撰

周書第十一

恭帝紀

恭帝諱宗訓世宗子也廣順三年歲在癸丑八月四日生於澶州之府第顯德六年六月癸未制授特進左衛上將軍封梁王食邑三千戶實封五百戶癸巳世宗崩

甲午內出遺制命帝柩前卽皇帝位是日羣臣奉帝卽位而退丁酉北面兵馬都部署韓令坤奏敗契丹五百騎于霸州北戊戌文武百寮宰臣范質等上表請聽政表三上允之壬寅文武臣寮上表請以八月四日為天壽節從之癸卯以司徒平章事范質為山陵使以翰林學士判太常寺事實儼為禮儀使以兵部尚書張昭為鹵簿使以御史中丞遼歸譚為儀仗使以宣徽南院使判開封事咎居潤為橋道頓遞使是月州郡十六奏大

雨連旬不止秋七月丁未以戶部尚書李濤為山陵副使以度支郎中盧億為山陵判官辛亥左散騎常侍申文炳卒乙卯右拾遺徐雄奪三任官坐誣奏雷澤縣令虛破戶也丁巳百寮釋服尚輦奉御金彥英本東夷人也奉使高麗稱臣于夷王故及于罪庚申以邢州節度使王仁鎬為襄州節度使進封開國公以侍衛步軍都指揮使曹州節度使檢校太保袁彥為陝州節度使加檢校太傅以右羽林統軍權知邢州事檢校太保李繼

勲為邢州節度使加檢校太傅以滑州留後檢校太保

陳思讓為滄州節度使以侍衛馬軍都指揮使陳州節

度使檢校太傅韓令坤為侍衛馬步都虞候依前陳州

節度使加檢校太尉以虎捷左廂都指揮使岳州防禦

使檢校司徒高懷德為夔州節度使充侍衛馬軍都指

揮使檢校太保以虎捷左廂都指揮使常州防禦使檢

校司空張鐸為遂州節度使充侍衛步軍都指揮使檢

校太保仍改名令鐸

宋史張令鐸傳云本名鐸以與河中張鐸同姓名故賜令名

士

戊以鄆州節度使充侍衛馬步軍都指揮使檢校太傅
兼侍中李重進為淮南節度使檢校太尉兼侍中依前
侍衛馬步軍都指揮使以襄州節度使檢校太尉同平
章事向拱為河南尹充西京留守加檢校太師兼侍中
通鑑向拱即向訓也避恭帝名改焉以宋州節度使充侍衛馬步軍副都

指揮使檢校太尉同平章事韓通為鄆州節度使依前
侍衛親軍馬步軍副都指揮使以澶州節度使檢校太
尉同平章事駙馬都尉張永德為許州節度使進封開

國公以今上為宋州節度使依前檢校太尉殿前都點
檢進封開國侯以淮南節度使兼殿前副都點檢檢校
太保慕容延釗為澶州節度使檢校太傅依前殿前副
都點檢進封開國伯以殿前都指揮使江州防禦使檢
校司空石守信為滑州節度使檢校太保依前殿前都
指揮使丙寅制大赦天下庚午翰林學士判太常寺竇
儼撰進大行皇帝太室歌酌獻辭舞曰定功之舞歌辭
不錄是月諸道相繼奏大雨所在川渠漲溢漂溺廬舍

損害苗稼八月甲戌朔以光祿卿致仕柴守禮為太子太保致仕乙亥翰林學士兼判太常寺竇儼撰進大行皇帝尊謚曰睿武孝文皇帝廟號世宗從之庚辰天下兵馬都元帥守尚書令兼中書令吳越國王錢俶加食邑一千戶實封四百戶改賜功臣天雄軍節度使檢校太師守太傅兼中書令魏王符彥卿加守太尉夏州節度使檢校太師守太保兼中書令西平王李彝興加守太傅荆南節度使檢校太師守中書令南平王高保融

加守太保壬午山陵使范質撰進大行皇帝陵名曰慶陵從之秦州節度使西面沿邊都部署檢校太師守中書令褒國公王景進封涼國公徐州節度使檢校太師兼中書令郭從義加開府儀同三司鄜州節度使檢校太師兼中書令邢國公武行德進封宋國公永興軍節度使檢校太師兼侍中李洪義加開府儀同三司鳳翔節度使檢校太尉兼侍中郭崇加檢校太師潞州節度使檢校太傅兼侍中李筠加檢校太尉朗州節度使檢

校太尉兼侍中周行逢加檢校太師甲申壽州節度使
檢校太師同平章事韓國公楊信封魯國公邠州節度
使檢校太尉劉重進廬州節度使檢校太尉趙贊鄧州
節度使檢校太尉宋延渥竝加開府儀同三司涇州節
度使檢校太尉白重贊河中節度使檢校太尉張鐸竝
加階爵丙戌易定節度使孫行友靈州節度使馮繼業
府州節度使折德宸竝自檢校太保加檢校太傅進階
爵以延州留後檢校太傅李萬全為延州節度使進封

開國公庾寅皇弟特進檢校太保左饒衛上將軍燕國
公食邑三千戶宗讓加檢校太傅進封曹王改名熙讓
熙謹可光祿大夫檢校太保右武衛大將軍封紀王食
邑三千戶熙誨可金紫光祿大夫檢校司徒左領衛大
將軍封蘄王食邑三千戶仍令所司擇日備禮冊命以
晉國長公主張氏為晉國大長公主以前陝州節度使
檢校太尉藥元福為曹州節度使進階爵甲午守司徒
同平章事弘文館大學士參知樞密院事范質加開府

儀同三司進封蕭國公門下侍郎兼禮部尚書同平章
事鹽修國史參知樞密院事王溥加右僕射進封開國
公樞密使中書侍郎同平章事集賢殿大學士魏仁浦
加兼刑部尚書依前樞密使檢校太傅右驍衛上將軍
吳延祚依前樞密使進封慶國公以左武衛上將軍史
全為左金吾上將軍致仕乙未以隴州防禦使王全斌
為相州留後戊戌宣徽南院使判開封府事叅居潤宣
徽北院使判三司張美並加檢校太傅己亥前司空李

穀加開府儀同三司趙國公以前太傅少卿朱渭為太僕卿致仕辛丑左金吾上將軍致仕史侁卒壬寅高麗國遣使朝貢兼進別序孝經一卷越王孝經新義一卷

皇靈孝經一卷孝經雌圖三卷

文昌雜錄云別序者記孔子所生及弟子從學

之事新義者以越王為問目釋疏文之義皇靈者止說延年避災之事及符文乃道書也雌圖者止說日之環暈星之字

亦非奇書

九月壬子前滄州留後李彥頤卒乙卯高麗

王王昭加檢校太師食邑三千戶丙辰以三司副使王贊為內客省使兼北面諸州水陸轉運使癸亥前開封

縣令路延規除名流沙門島先是延規有過停任有司
召延規宣勅延規拒命為憲司所按故有是命甲子以
端明殿學士禮部侍郎竇儀為兵部侍郎充職以尚書
戶部員外郎直樞密院杜華為司門郎中充樞密直學
士賜紫以翰林學士尚書度支員外郎王著為金部郎
中知制誥充職仍賜金紫是日翰林學士尚書屯田郎
中知制誥李昉都官郎中知制誥扈蒙水部郎中知制
誥趙逢竝加柱國賜金紫乙丑兵部尚書張昭進封舒

國公戶部尚書李濤進封莒國公以太子詹事劉溫叟
為工部侍郎判國子祭酒事是月京師及諸州郡霖雨
踰旬所在水潦為患川渠泛溢冬十月癸酉朔以司農
卿致仕李錯為太僕卿致仕太常少卿致仕姚遂為將
督監致仕丁亥太子太師薛懷讓封杞國公壬辰翰林
學士判太常寺事實儼撰進貞惠皇后廟歌辭丁酉世
宗皇帝靈駕發引戊戌以前相州留後王暉為右神武
統軍辛丑江南國主李景來告世子弘冀卒遣御厨使

張延範充弔祭使十一月壬寅朔葬世宗皇帝于慶陵
以貞惠皇后劉氏祔焉戊申西京奏太子太師致仕白
文珂卒丙辰日南至百寮奉表稱賀戊午廢兗州廣利
軍依舊為萊蕪監壬戌升鳳州固鎮為雄勝軍丙寅左
羽林統軍馬希崇案原本有脫誤十二月壬申朔史館奏請差
官修撰世宗實錄從之甲戌改萬歲殿為紫宸殿甲午
西京奏左屯衛上將軍致仕李萼卒乙未大霖晝昏凡
四日而止分命使臣賑給諸州遭水人戶

顯德七年春正月辛丑朔文武百寮進名奉賀鎮定二

州馳奏契丹入寇河東賊軍自土門東下與蕃寇合勢

詔今上率兵北征癸卯發京師是夕宿于陳橋驛未曙

軍變將士大譟呼萬歲擐甲將刃推戴今上陞大位扶

策升馬擁迫南行是日詔曰天生蒸民樹之司牧二帝

推公而禪位三王乘時以革命其極一也予末小子遭

家不造人心已去國命有歸咨爾歸德軍節度使前都

點檢趙

案原本
空二字

稟上聖之姿有神武之畧佐我高祖格

于皇天逮事世宗功存納麓東征西怨厥績懋焉天地
鬼神享于有德謳謠獄訟附于至仁應天順民法堯禪
舜如釋重負予其作賓嗚呼欽哉祇畏天命今上于是
詣崇元殿受命百官朝賀而退制封周帝為鄭王以奉

周祀正朔服色一如舊制奉皇太后為周太后

續通鑑
長編建

隆三年周鄭
主出居房州

皇朝開寶六年春崩于房陵今上聞之震

慟發哀成服于便殿百寮進名奉慰尋遣中使監護其

喪

續通鑑長編開寶六年三月乙卯房州上
言周鄭王殂上素服發哀輟視朝十日

以其年十

月歸葬于世宗慶陵之側詔有司定諡曰恭皇帝陵曰

順陵

續通鑑長編仁宗嘉祐四年詔有司取崇氏譜系于諸房中推最長一人令歲時奉周祀


史臣曰夫四序之氣寒往則暑來五行之數金銷則火
故堯舜之揖讓漢魏之傳禪皆知其數而順乎人也
恭帝當紉綺之冲年會笙鏞之變響聽謳歌之所屬
知命歷之有在能遜其位不亦善乎終諡為恭故其宜
矣

舊五代史卷一百二十

舊五代史卷一百二十考證

周恭帝紀恭帝諱宗訓世宗子也案五代會要云世宗
後宮所生歐陽史作不知其母為誰氏今附識于此
孝經雌圖三卷三卷歐陽史作一卷

舊五代史卷一百二十考證



總校官編修臣朱 鈐

校對官學錄臣謝登雋

謄錄監生臣陳山紀

欽定四庫全書薈要

史部

舊五代史卷一百二十一至
七



詳校官編修臣王天祿

欽定四庫全書薈要卷五千五百二十二

舊五代史卷一百二十一

宋門下侍郎參知政事監修國史薛居正等撰

書第十二

后妃列傳一

太祖聖穆皇后柴氏邢州龍岡人世家豪右太祖微時

在洛陽聞后賢淑遂聘之

東都事畧張永德傳云周太祖柴后本唐莊宗之嬪御也

莊宗沒明宗遣歸其家行至河上父母逐之會大風雨止於逆旅數日有一丈夫走過其門衣弊不能自庇后



見之驚曰此何人耶逆旅主人曰此馬步軍使郭雀兒者也后異其人欲嫁之請於父母父母恚曰汝帝左右人歸當嫁節度使奈何欲嫁此人后曰此貴人也不可失也囊中裝分半與父母我取其半父母知不可奪遂成婚於逆旅中所謂郭雀兒即周太祖也

太祖壯年喜飲博好任俠不拘細行后規其太過每有內助之力焉世宗皇帝即后之姪也幼而謹愿后甚憐之故太祖養之為己子太祖嘗寢后見五色小蛇入顴鼻間心異之知其必貴敬奉愈厚未及貴而厭代太祖即位乃下制曰義之深無先於作配禮之重莫大於追宗朕當宁載思撫存懷舊河洲令

德猶傳荇菜之詩為泂大名不及珩璜之貴俾盛副并
之禮以伸求劍之情故夫人柴氏代籍貽芳湘靈集慶
體柔儀而陳闕翟芬若椒蘭持中操以選中璫譽光圖
史懿範尚留於閨閫昌言有助於箴規深惟望氣之艱
彌歎藏舟之速將開寶祚俄謝瑩台宜正號於軒宮俾
潛耀於坤象可追命為皇后仍令所司定諡備禮冊命
既而有司上諡曰聖穆顯德初太祖神主入廟以后祔
於其室

淑妃楊氏鎮州真定人父弘裕真定少尹

東都事畧楊廷璋傳父弘

裕少漁貂裘服有以二石雁授之者其翼一掄左一掄右曰吾北岳使也言訖不知所之是年生女爲周太祖

淑妃明年生廷璋

當河朔三鎮全盛時所屬封疆制之於守帥

故韶顏美媛皆被選於王宮妃幼以良家子中選事趙

王王鎔張文禮之亂妃流離於外唐明宗在藩錄其遺

逸安重誨保庇妃家致其仕進父母即以妃嫁於鄉人

石光輔不數年嫠居太祖佐漢之初屬聖穆皇后棄世

聞妃之賢遂以禮聘之

宋史楊廷璋傳有婦寡居京師周祖微時欲聘之婦不從今媒

氏傳言恐逼姝以告廷璋廷璋往見周祖歸
謂姝曰此人姿貌異常不可拒姝乃從之

妃睦族撫

孤宜家內助甚有力焉晉天福末卒於太原因留葬於
晉郊廣順元年九月追冊為淑妃太祖凡一后三妃及
高陵就掩皆議陪祔時以妃喪在賊境未及遷定世宗
乃詔有司於高陵之側預營一冢以虛之俟賊平即議
襄事顯德元年夏世宗征河東果成素志焉妃兄廷璋
早事太祖即位累厯內職出為晉州節度使皇朝撫運
移鎮邢州又改鄜州受代歸闕卒於私第

貴妃張氏恒州眞定人也祖記成德軍節度判官檢校
兵部尚書父同芝本州諮呈官檢校工部尚書事趙王
王鎔歷職中要天祐末趙將張文禮殺王鎔以鎮州歸
梁莊宗命將符存審討平之時妃年尚幼有幽州偏將
武從諫者駐旆於家見妃韶令乃為其子聘之武氏家
在太原太祖從漢祖鎮并門屬楊夫人以疾終無何武
氏子卒太祖素聞妃之賢遂納為繼室太祖貴累封至
吳國夫人漢隱帝末蕭牆變起屠害大臣太祖在鄴都

被讒妃與諸皇屬同日遇害於東京舊第太祖踐祚追冊為貴妃發哀故世宗有起復之命世宗嗣位以太祖舊宅即妃遇害之地因施為僧院以皇建為名焉

德妃董氏常山靈壽人也祖文廣唐深州錄事叅軍父光嗣趙州昭慶尉妃孩提穎悟始能言聽按絲管而能辨其聲年七歲遇鄭州亂親黨羈離與妃相失潞州牙將得之匿於褚中其妻以息女不育得妃憐之過於所生姆教師箴功容克備妃家悲念其兄瑀諸處求訪垂

六七年後潞將入官於朝妃之鄉親頗有知者瑀見潞將欣歸之時年十三妃歸踰年嫁為里人劉進超之妻進超為內職及契丹破晉之歲陷蕃歿焉妃發居洛陽太祖楊淑妃與妃鄉親平居恒言妃賢德太祖從漢祖幸洛因憶淑妃之言尋以禮納之鼎命初建張貴妃遇禍中宮虛位乃冊為德妃太祖自聖穆皇后早世以來屢失邦援中幃內助唯妃存焉加以結珮脫簪率由令範廣順三年夏遇疾醫藥之際屬太祖究海之征車駕

將行妃奏曰正當暑毒勞陛下省廵明發宵征須人供
侍司簿已下典事者各已處分從行太祖曰妃疾未平
數令診視此行在近無煩內人及太祖駐蹕魯中妃志
欲令內人進侍發中使往來言之太祖手勅鄭仁誨曰切
慮德妃以朕至兗州行營津置內人承侍緣諸軍在野
不可自安令鄭仁誨專心體候如德妃津置內人東來
便須上聞約住或取索鞍馬不得供應如意堅確即以
手勅示之既而平定兗州車駕還京妃疾無減俄卒于

大內時年三十九輟朝三日妃長兄瑀以左贊善大夫致仕仲兄玄之季兄自明皆累歷郡守

世宗貞惠皇后劉氏將家女也幼歸於世宗漢乾祐中世宗在西班后始封彭城縣君世宗隨太祖在鄴后留居邸第漢末李業等作亂后與貴妃張氏及諸皇族同日遇禍國初追封彭城郡夫人顯德四年夏四月追冊為皇后諡曰貞惠陵曰惠陵

宣懿皇后符氏祖存審事後唐武皇莊宗位極將相追

封秦王父彥卿天雄軍節度使封魏王后初適李守貞之
子崇訓漢乾祐中守貞叛於河中太祖以兵攻之及城
陷崇訓自刃其弟妹次將及后后時匿於屏處以帷箔
自蔽崇訓倉皇求后不及遂自刎后因獲免太祖入河
中令人訪而得之即遣女使送於其父自是后常感太
祖大惠拜太祖為養父世宗鎮澶淵日太祖為世宗聘
之后性和惠善候世宗之旨世宗或暴怒於下后必從
容救解世宗甚重之及即位冊為皇太后世宗將南征后

常諫止之言甚切直世宗亦為之動容泊車駕駐於淮
甸久冒炎暑后因憂患成疾顯德二年七月二十一日
崩於滋德殿時年二十有六世宗甚悼之既而有司上

謚曰宣懿葬於新鄭陵曰懿陵

案世宗有兩符后其後符后即宣懿之女弟也

宋稱符太后是書不為立傳未免闕畧

五代史補世

宗皇后符氏即魏王燕卿之女時有相工視之大驚竊

告魏王曰此女貴不可言李守貞素有異志因與子崇

訓娶之禮畢守貞甚有喜色其後據河中叛高祖為樞

密使受命出征后知高祖與其父有舊城破之際據堂

門而坐叱諸軍慎勿無禮於是諸軍皆然引退頃之高

祖至喜曰此女於白刃紛拏之際保全可謂非常人也

乃歸之魏王至世宗即位納為皇后既免河中之難其

母欲使出家資其福壽后不悅曰死生有命誰能見首
洗足以求苟活也母度不可逼遂止世宗素以后賢又
聞命不以為出家為念愈
賢之所以為天下母也

史臣曰周室后妃凡六人而追冊者四故中闡內則罕
得而聞唯董妃符后之懿範亦無愧於彤管矣

齊薛史
無外戚

傳考五代會要云周太祖第三女樂安公主為漢室所
害廣順元年二月追封至顯德四年四月又追封莒國
長公主第四女壽安公主降張永德廣順元年四月封
至顯德元年封晉國長公主第五女永寧公主廣順元
年九月追封至顯德四年
四月又追封梁國長公主

舊五代史卷一百二十一

舊五代史卷一百二十一考證

周后妃列傳一太祖聖穆皇后柴氏傳邢州龍岡人
索龍川別志作魏成安人

淑妃楊氏傳妃兄廷璋索東都事畧廷璋係淑妃之
弟續通鑑長編亦云廷璋有姊為周太祖妃俱與是
書異

舊五代史卷一百二十一考證

欽定四庫全書薈要卷五千五百二十三

舊五代史卷一百二十二

宋門下侍郎參知政事監修國史薛居正等撰

周書第十三

宗室列傳二

剌王侗太祖子初名青哥漢末遇害太祖即位詔贈太尉賜名侗顯德四年追封

杞王信太祖子初名意哥漢末遇害太祖即位詔贈司

空賜名信顯德四年追封

案太祖諸子蚤歲遇害本無事蹟原本過于簡畧疑有刪

節今据歐陽史家人傳云初帝舉兵于魏漢以兵圍帝第時張貴妃與諸子青哥意哥姪守筠奉超定哥皆被誅青哥意哥不知其母誰氏太祖即位詔故第二子青哥贈太尉賜名侗第三子意哥贈司空賜名信皇姪守筠贈左領軍衛將軍以筠聲近榮為世宗避更名守愿奉超贈左監門衛將軍定哥贈左千牛將軍賜名遜世宗顯德四年夏四月癸未詔曰禮以緣情思以悼往矧在友于之列尤鍾惻愴之情故皇弟贈太保侗贈司空信景運初啓天年不登俾予終鮮實慟予懷侗可贈太傅追封剡王信司空杞王又詔曰故皇從弟贈左領軍衛將軍守愿贈右監門衛將軍奉超贈左千牛衛將軍遜等頃因季世不享遐齡每念非辜難忘有慟守愿可贈左衛大將軍奉超右衛大將軍遜右武衛大將軍

越王宗誼世宗子漢末遇害顯德四年追封

曹王宗讓世宗子顯德六年封

紀王熙謹世宗子顯德六年封皇朝乾德二年卒

蘄王熙誨世宗子顯德六年封

歐陽史家人傳云世宗子七人長曰宜哥次二

皆未名次曰恭皇帝次曰熙讓次曰熙謹次曰熙誨皆不知其母為誰氏宜哥與其二皆為漢誅太祖即位詔賜皇孫名誼贈左驍衛大將軍誠左武衛大將軍誠左屯衛大將軍顯德三年羣臣請封宗室世宗以謂為國日淺恩信未及于人須功德大成慶流于世而後議之可也明年夏四月癸巳先封太祖諸子又詔曰父子之道聖賢不忘再思天關之端愈動悲傷之抱故皇子左驍衛大將軍誼左武衛大將軍誠左屯衛大將軍誠等

追惟往事有足傷懷宜增一字之封仍贈三台之秩誼
可贈太尉追封越王誠太傅吳王誠太保韓王而皇子
在者皆不封六年北復三關遇疾還京師六月癸未皇
子宗訓特進左衛上將軍封梁王而宗讓亦拜左驍衛
上將軍封燕國公後十日而世宗崩梁王即位是為恭
皇帝其年八月宗讓更名熙讓封曹王熙謹熙誨皆前
未封爵遂拜熙謹右武衛大將軍封紀王熙誨右領軍
衛大將軍封蘄王乾德二年十月熙謹卒熙讓熙誨不
知其
所終

舊五代史卷一百二十二

舊五代史卷一百二十二攷證

周宗室列傳二世宗子 案歐陽史周家人傳世宗子
七人第四子嗣位即恭皇帝其應入列傳者尚有六
子是書不載吳王誠韓王誠當是脫簡

舊五代史卷一百二十二 政證

欽定四庫全書薈要卷五千五百二十四

舊五代史卷一百二十三

宋門下侍郎參知政事監修國史薛居正等撰

周書第十四

列傳三

高行周字尚質幽州人也生於媯州懷戎軍之鵬窠里
曾祖順厲世戍懷戎父思繼昆仲三人俱雄豪有武幹
聲馳朔塞唐武皇之平幽州也表劉仁恭為帥仍留兵

以戍之以思繼兄為先鋒都將媯州刺史思繼為中軍都將順州刺史思繼弟為後軍都將昆仲分掌燕兵部下士伍皆山北之豪也仁恭深憚之武皇將歸私謂仁恭曰高先鋒兄弟勢傾州府為燕患者必此族也宜善籌之久之太原戍軍恣橫思繼兄弟制之以法所殺者多太祖怒詆讓仁恭乃訴以高氏兄弟遂併遇害仁恭因以先鋒子行珪為牙將諸子並列帳下厚撫之以慰其心時行周十餘歲亦補職在仁恭左右行珪別有傳

在唐書及莊宗收燕以行周隸明宗帳下常與唐末帝分率牙兵明宗征燕率兵隨行鄉人趙德鈞謂明宗曰行周心甚謹厚必享貴位梁將劉鄩之據莘也與太原軍對壘旦夕轉鬪常一日兩軍成列元行欽為敵軍追躡劍中其面血戰未解行周以麾下精騎突陣解之行欽獲免莊宗方寵行欽召行周撫諭賞勞而欲置之帳下又忿於明宗帳下已奪行欽更取行周恐傷其意密令人以利祿誘之行周辭曰總管用人亦為國家事

總管猶事王也余家昆仲脫難再生承總管之厚恩忍背之乎及兩軍屯於河上覘知梁軍自汴入楊村寨明宗晨至斗門設伏將邀之衆寡不敵反為所乘時予稍叢萃勢甚危蹙行周聞之出騎橫擊梁軍遂得解去明宗之襲鄆州也行周為前鋒會夜分澍兩人無進志行周曰此天贊也彼必無備是夜涉河入東城比曙平之莊宗平河南累加檢校太保領端州刺史同光末出守絳州明宗即位特深委遇天成中從王晏球圍定州敗

王都擒托暉皆有功賊平遷潁州團練使長興初以北
邊陷契丹用為振武軍節度使明年以河西用軍移鎮
延安清泰初改潞州節度使晉祖建義於太原唐末帝
命張敬達征之行周與符彥卿為左右排陣使契丹主
入援太原也行周彥卿引騎拒之尋為契丹所敗遂與
敬達保晉安砦累月救軍不至楊光遠欲圖敬達行周
知之引壯士護之敬達性慙不知其營護謂人曰行周
每踵余後其意何也繇是不復敢然敬達遂為光遠所

害晉祖入洛令行周還藩加同平章事晉祖都汴以行
周為西京留守未幾移鄴都晉祖幸鄴會安從進叛命
行周為襄州行營都部署明年秋平定漢南晉少帝嗣
位加兼侍中移鎮睢陽開運初從韋譚淵拒敵於河上
車駕還京代景延廣為侍衛親軍都指揮使移鄆州節
度使時李彥韜為侍衛都虞候可否在已行周雖典禁
兵每心遊外退朝歸第門宇脩然賓友過從但引滿而
已尋改歸德軍節度使以李守貞代掌兵柄許行周歸

藩晉軍降於中渡也少帝命行周與符彥卿同守澶州

戎王入汴召赴京師會草寇攻宋州急遣行周歸鎮

宋史

高懷德傳杜重威降契丹京東諸州羣盜大起懷德聖瑩清野敵不能入行周率兵歸鎮敵遂解去

及契

丹主卒於藥城契丹將蕭翰立許王李從益知南朝軍

國事遣死士召行周辭之以疾退謂人曰衰世難輔况

兒戲乎漢高祖入汴加守太傅兼中書令代李守貞為

天平節度使杜重威據鄴叛漢祖以行周為招討使總

兵討之鄴平授鄴都留守加守太尉進爵臨清王乾祐

中入覲加守太師進封鄴王復授天平節鉞改封齊王
太祖踐祚加守尚書令增食邑至一萬七千戶太祖以
行周耆年宿將賜詔不名但呼王位而已慕容彥超據
兗叛太祖親征奉迎輿駕傾家載贄奉觴進俎率以身
先太祖待之逾厚廣順二年秋以疾薨于位享年六十
八贈賻加等冊贈尚書令追封秦王諡曰武懿子懷德
皇朝駙馬都尉宋州節度使

安審琦字國瑞其先沙陁部人也祖山盛朔州牢城都

校贈太傅父金全安北都護振武軍節度使累贈太師
唐書有傳審琦性驍果善騎射幼以良家子事莊宗為
義直軍使遷本軍指揮使天成初唐末帝由潞邸出鎮
河中奏審琦為牙兵都將未幾入為歸化指揮使王師
伐蜀充行營馬軍都指揮使及凱旋改龍武右廂都校
領富州刺史清泰初為捧聖指揮使領順化軍節度使
其年鎮邢州兼北面行營排軍陣使從張敬達圍太原
及楊光遠舉晉安寨降于晉祖審琦亦預焉晉祖踐阼

加檢校太傅同平章事充天平軍節度使兼侍衛馬步
軍都指揮使旋以母喪起復天福三年就加檢校太尉
尋改晉昌軍節度使京兆尹七年移鎮河中晉少帝嗣
位加檢校太師開運末朝廷以北裔入境以審琦為北
面行營馬軍左右廂都指揮使與諸將會兵于洺州俄
而敵騎大至時皇甫遇慕容彥超亦預其行乃率所部
兵與敵戰於安陽河上時遇馬為流矢所中勢已危蹙
諸將相顧莫有敢救者審琦謂首將張從恩曰皇甫遇

等未至必為敵騎所圍若不急救則為擒矣從恩曰敵
勢甚盛無以枝梧將軍獨往何益審琦曰成敗命也若
不濟與之俱死假令失此二將何面目以見天子遂率
鐵騎北渡敵見塵起謂救兵至乃引去遂救遇與彥超
而還晉少帝嘉之加兼侍中移領許州未幾移鎮兗海
漢有天下授襄州節度使兼中書令屬荆人叛命潛遣
舟師數千屠襄郢審琦禦之而遁朝廷賞功就加守太
保進封齊國公歲餘又加守太傅國初封南陽王顯德

初進封陳王世宗嗣位加守太尉三年拜章請覲優詔許之加守太師增食邑至一萬五百戶食實封二千三百戶審琦鎮襄沔僅一紀嚴而不殘威而不暴故南邦之民甚懷其惠五年移平廬軍節度使承詔赴鎮因朝於京師世宗以國之元老禮遇甚厚車駕親幸其第以寵之六年正月七日夜為其隸人安友進安萬合所害時年六十三初友進與審琦之愛妾私通有年數矣其妾常慮事泄見誅因與友進謀害審琦友進甚有難色

其妾曰爾若不從我當反告友進乃許之至是夕審琦
沈醉寢於帳中其妾乃取審琦所枕劒與友進友進猶
惶駭不敢刺刃遽召其黨安萬合便殺審琦既而慮事
泄乃引其帳下數妓盡殺以滅其跡不數日友進等竟
敗悉為子守忠嚮而戮之世宗聞之震悼輟視朝三日
詔贈尚書令追封齊王守忠仕皇朝累為郡守

安審暉字明遠審琦之兄也起家自長直軍使轉外衙
左廂軍使從莊宗平幽薊戰山東定河南皆預其功同

光中授蔚州刺史天成初改汝州防禦副使歷鳳翔徐
州節度副使河東行軍司馬晉高祖龍飛以霸府上僚
授振武兵馬留後遷河陽節度使不踰月移鎮鄜州丁
內艱起復視事五年李金全據安州叛詔馬全節為都
部署領兵討之以審暉為副安陸平移鎮鄧州進位檢
校太傅六年冬襄州安從進叛舉漢南之衆北攻南陽
南陽素無城壁唯守衙城賊傳城下審暉登陴召賊帥
以讓之從進不克而退襄州平就加檢校太尉少帝嗣

位加檢校太師罷鎮授右羽林統軍歲餘出鎮上黨屬
契丹內侵授邢州節度使居無何目疾暴作上章求代
歸於京師養疾累年太祖即位召於內殿從容顧問尤
所歎重將以祿起之審暉辭以暮齒願就頤養拜太子
太師致仕封魯國公累食邑五千戶實封四百戶廣順
二年春卒年六十三廢朝二日詔贈侍中謚曰靜子守
鱗仕皇朝為贊善大夫

安審信字行光審琦之從父兄也父金祐世為沙陁部

偏裨名聞邊塞審信習騎射從父金全天成初為振武
節度使補為牙將俄而兄審通為滄州節度使用為衙
內都虞候歷同陝許三州馬步軍都指揮使晉祖起義
於太原唐末帝命張敬達以兵攻之而審琦率先以部
下兵遁入并州晉祖以其故人得之甚悅其妻與二子
在京師皆為唐末帝所戮但貸其老母而已契丹既降
晉安砮晉高祖以審信為汾州刺史檢校太保充馬步
軍副部署晉祖入洛授河州節度使檢校太尉同平章

事審信性既翻覆率多疑忌在蒲中時每王人告諭騎
從稍多必潛設備以防其圖已尋厯許兗州鎮所至以
聚斂為務民甚苦之會朝廷謀大舉北伐凡藩侯皆預
將帥以審信為馬步軍右廂都排陣使俄改華州節度
使漢初移鎮同州入為左衛上將軍國初轉右金吾上
將軍三年夏四月太祖御乾元殿入閣審信不赴班位
為御史所彈詔釋之時審信久病神情恍忽聞臺司奏
劾揚言曰趨朝偶晚未是大過何用彈舉我終進奉二

萬緡盡逐此乞索兒輩未幾以病請退授太子太師致仕是歲秋卒年六十贈侍中諡曰成穆

李從敏字叔達唐明宗之猶子也沈厚寡言善騎射多計數初莊宗召見試弓馬用為衙內馬軍指揮使從平汴洛補帳前都指揮使遷捧聖都將明宗移鎮眞定表為成德軍馬步軍都指揮使從明宗入洛補皇城使出為陝府節度使王都據定州叛命王晏球為招討使率師討之以從敏為副領滄州節度使王都平移授定州

尋代范延光為成德軍節度使加檢校太尉封涇王鎮
州有市人劉方遇家富於財方遇卒無子妻弟田令遵
者幼為方遇治財善殖貸劉族乃共推令遵為方遇子
親族共立券書以為誓信累年後方遇二女取資於令
遵不如意乃訟令遵冒姓奪父家財從敏令判官陸浣
鞠其獄而殺令遵

北夢瑣言云鎮州市人劉方遇家財數十萬方遇妻田氏蚤卒田之妹為

尼常出入方遇家方遇使尼長髮為繼室有田令遵者
方遇之妻弟也善貨殖方遇以所積財令令遵興殖焉
方遇有子年幼二女皆嫁方遇疾卒子幼不能留家業
方遇妻及二女以家財素為令遵興殖乃聚族合謀請

以令遵姓劉為方過繼嗣即令鬻券人安美為親族請嗣券書既定乃違令遵服斬衰居喪而二女初立令遵時先邀每月供財二萬及後求取無厭而石李二女夫使二女詣本府論訴云令遵冒姓奪父家家財令遵下獄石李二夫族與本府要吏親黨上至府帥判官行軍司馬隨使都押衙各受方過二女賂錢數千緡而以令遵與姊及書券安美同情共盜俱棄市人知其寃

令遵父詣臺訴寃詔本州節

度副使符蒙掌書記徐台符鞠之備明姦狀及詰二女服行賂於節度使趙環代判高知柔觀察判官陸浣並捕下獄具服贓罪事連從敏甚懼乃令其妻赴洛陽入宮告王淑妃明宗知之怒曰朕用從敏為節度使而枉

法殺人我羞見百官又令新婦奔赴不須見吾面時王
淑妃頗庇護之趙環等三人竟棄市從敏罪止於罰俸
而已

北夢瑣言從敏初欲削官中官哀祈免罰年俸

長興初移鎮宋州唐末帝

起兵於鳳翔其子重吉為亳州防禦使從敏承朝廷命
害之清泰中從敏與洋王從璋並罷歸第待之甚薄嘗
宮中同飲既醉末帝謂從璋從敏曰爾等何物處雄藩
大鎮二人大懼賴曹太后見之叱曰官家醉爾輩速出
去方得解晉祖革命降封莒國公再領陝州尋移鎮上

黨入為右龍武統軍出為河陽節度使漢祖入汴移授
西京留守累官檢校太師同平章事隱帝即位就加兼
侍中改封秦國公歲餘以王守恩代還廣順元年春以
疾卒年五十四詔贈中書令諡曰恭惠

鄭仁誨字日新晉陽人父霸累贈太子太師仁誨幼事
唐驍將陳紹光恃勇使酒嘗乘醉抽佩劍將剗刃於仁
誨左右無不奔避唯仁誨端立以俟畧無懼色紹光因
擲劍於地謂仁誨曰汝有此器度必當享人間富貴及

紹光典郡仁誨累為右職後退歸鄉里以色養為樂漢
高祖之鎮河東也太祖累就其第與之燕語每有質問
無不以正理為答太祖深器之漢有天下太祖初領樞
務即召為從職及太祖西征嘗密贊軍機西師凱旋累
遷至檢校吏部尚書太祖踐阼旌佐命功授檢校司空
客省使兼大內都點檢恩州團練使尋為樞密副使踰
年轉宣徽北院使右衛大將軍出鎮澶淵轉檢校太保
入為樞密使加同平章事世宗之北征也以仁誨為東

京留守調發軍須供億無闕車駕廻加兼侍中尋丁內
艱未幾起復顯德二年冬疾亟世宗幸其第親加撫問
欵歔久之及卒世宗親臨其喪哭踰數舉是時世宗將
行近臣奏云歲道非便不宜臨喪弗聽然而先之以桃
菊之事時以為得禮仁誨為人端厚謙損造次必由於
禮及居樞務雖權位崇重而能孜孜接物無自矜之色
及終故朝廷咸惜之詔贈中書令追封韓國公諡曰忠
正既葬命翰林學士陶穀撰神道碑文官為建立表特

恩也子勲累厯內職蚤卒絕嗣初廣順末王殷受詔赴
闕太祖遣仁誨赴鄴都巡檢及殷得罪仁誨不奉詔即
殺其子益利其家財妓樂也及仁誨卒而無後人以為
陰責焉

張彥成潞州潞城人也曾祖靜汾州刺史祖述澤州刺
史父礪昭義行軍司馬彥成初為并州牙將天成中自
秦州鹽鐵務官改鄆州都押牙漢祖鎮北門表為行軍
司馬以隱帝娶其女特見親愛從平汴洛累加特進檢

校太尉同州節度使隱帝即位就加同平章事太祖之
伐河中彥成有饋輓之勞河中平加檢校太師乾祐三
年冬移鎮相州廣順初就加兼侍中尋移鎮南陽三年
秋代歸授右金吾衛上將軍其年秋以疾卒年六十贈

侍中

宋史楊克讓傳乾祐中同州節度張彥成表授掌
書記周廣順初彥成移鎮安陽讓下克讓以舊職

從行彥成入為執金吾病篤奏稱其材可用克讓以彥
成死未葬不忍就祿退居別墅俟張氏子外除時論稱
之

安叔千沙陀三部落之種也父懷盛事唐武皇以驍勇

聞叔千習騎射從莊宗定河南為奉安部將天成初王
師伐定州命為先鋒都指揮使王都平授泰州刺史連
判涿易二郡清泰初契丹入鴈門叔千從晉祖迎戰敗
之進位檢校太保振武節度使晉祖踐阼就加同平章
事天福中厯汾滄邢晉四鎮節度使叔千鄙野而無文
當時謂之安沒字言若碑碣之無篆籀但虛有其表耳
開運初朝廷將大舉北伐授行營都排陣使俄改左金
吾衛上將軍契丹入汴百僚迎見於赤岡契丹主登高

岡駐馬而撫諭漢官叔千出班獨立契丹主曰爾是安
沒字否卿比在邢州日遠輸誠歟我至此汝管取一喫
飯處叔千拜謝而退俄授鎮國軍節度使漢初遇代歸
京自以嘗附幕庭居常愧惕久之授太子太師致仕尋
請告歸洛廣順二年冬卒年七十二詔贈侍中

宋彥筠雍邱人也初隸滑州軍梁氏與莊宗夾河之戰
彥筠時為戰棹都指揮使以勞遷開封府牙校莊宗有
天下擢領禁軍伐蜀之役率所部從康延孝為前鋒蜀

平虜結俞二川刺史明宗在位連典數郡晉初自汝州
防禦使計安從進於襄陽以功拜鄧州節度使累官至
檢校太尉未幾歷晉陝二鎮晉少帝嗣位再領鄧州尋
移鎮河中漢初受太子太師致仕國初拜左衛上將軍
世宗嗣位復為太子太師致仕顯德四年冬卒於西京
之私第輟視朝一日詔贈侍中初殯筠入成都據一甲
第第中資貨鉅萬妓女數十輩盡為其所有一旦與其
主母微忿遽擊殺之自後常有所睹筠心不自安乃

修浮屠法以禳之因而溺志於釋氏其後每歲至金仙
入涅之日常衣斬衰號慟於其像前其佞佛也如是家
有侍婢數十人皆令削髮披緇以侍左右大為當時所
誚又性好貨殖能圖什一之利良田甲第相望於郡國
將終以伊洛之間田莊十數區上進並藉於官焉

史臣曰近代領戎藩列王爵祿厚而君子不議望重而
人主不疑能自晦於飲酌之間保功名於始終之際如
行周之比者幾何人哉奕世藩翰固亦宜然審琦有分

閫之勞乏御家之道峰指王折蓋不幸也其餘雖擁戎
旃未聞閫政固不足與文邵龔黃為比也

舊五代史卷一百二十三

舊五代史卷一百二十三考證

周列傳三高行周傳 行周通鑑考異引莊宗實錄作
行溫是書唐紀尚仍實錄之舊

鄭仁誨傳太祖踐阼旌佐命功授檢校司空客省使
案歐陽史云漢興周太祖為樞密使乃召仁誨用之
累官至內客省使太祖入立以仁誨為大內都巡檢
據此傳仁誨仕周始為客省使與歐陽史異

張彥成傳 案通鑑考異彥成本名彥威避周祖諱故

改

托輝舊作禿餒今改

舊五代史卷一百二十三考證

欽定四庫全書薈要卷五千五百二十五

舊五代史卷一百四十四

宋門下侍郎參知政事監修國史薛居正等撰

周書第十五

列傳四

王殷瀛州人曾祖昌裔本州別駕祖光滄州教練使因家馬唐末幽滄大亂殷父咸珪避地南遷因投于魏軍殷自言生于魏州之開元寺旣長從軍漸為偏將唐同

光末為華州馬步軍副使因家于華下天成中移授靈

武都指揮使久之代還清泰中張令昭據鄴叛殷從范

延光討之首冒矢石率先登城以功授祁州刺史尋改

原州殷性謙謹好禮事母以孝聞每與人結交違從皆

先稟于母母命不從殷必不往雖在軍旅交遊不雜及

為刺史政事小有不佳母察之立殷于庭詰責而杖之

歐陽史殷為刺史政事有小失母責之殷即取杖授婢僕自笞于母前

晉天福中丁內艱

尋有詔起復授憲州刺史殷上章辭曰臣為末將出處

無損益于國家臣本燕人值鄉國離亂少罹偏罰因母
鞠養訓導方得成人不忍遽釋苴麻遠離廬墓伏願許
臣終母喪紀晉高祖嘉而許之晉少帝嗣位會殷服闋
召典禁軍累遷奉國右廂都指揮使漢祖受命從討杜
重威于鄴下殷與劉嗣皆率先力戰矢中于首久之出
折鏃于口中以是漢祖嘉之乾祐末遷侍衛步軍都指
揮使領夔州節度使會契丹寇邊遣殷領兵屯澶州及
李業等作亂漢隱帝密詔澶帥李洪義遣圖殷洪義懼

不克反以變告殷殷與洪義同遣人至鄴請太祖赴內
難殷從平京師授侍衛親軍都指揮使太祖即位授天
雄軍節度使加同平章事典軍如故殷赴鎮以侍衛司
局從凡河北征鎮有敵兵處咸稟殷節制又于民間多
方聚斂太祖聞而惡之因使宣諭曰朕離鄴時帑廩所
儲不少卿與國家同體隨要取給何患無財三年夏太
祖征兗還殷迎謁于路宴賜而去及王峻得罪太祖遣
其子飛龍使承誨往謁令口諭峻之過惡以慰其心三

年秋以永壽節上表請覲太祖雖允其請且慮殷之不誠尋遣使止之何福進在鎮州素惡殷之太橫福進入朝撫其陰事以奏之太祖遂疑之是年冬以郊裡有日殷自鎮入覲太祖令依舊內外巡警殷出入部從不下數百人又以儀形魁偉觀者無不聳然一日遽入奏曰郊禮在近兵民大集臣城外防警請量給甲仗以備非常太祖難之時中外以太祖嬰疾步履稍難多不視朝俯逼郊裡殷有震主之勢頗憂之太祖乃力疾坐于滋

德殿殷入起居即命執之尋降制流竄及出都城遽殺之衆情乃安是歲春末鄴城寺鐘懸絕而落又火光出幡竿之上殷之入覲也都人餞于離亭上馬失鎗墮于地人訝其不祥果及于禍太祖尋令澶帥鄭仁誨赴鄴殷次子為衙內指揮使不候謁仁誨誅之遷其家屬于登州

何福進字善長太原人父神劒累贈左驍衛大將軍福進少從軍以驍勇聞唐同光末郭從謙以兵圍莊宗于

大內福進時為宿衛軍校獨出死力拒戰于內後明宗
知而嘉之擢為奉聖軍校出為磁州刺史充北面行營
先鋒都校清泰中自彰聖都虞候率本軍從范延光平
鄴以功歷鄭隴二州防禦使開運中由潁州團練使入
拜左驍衛大將軍屬契丹陷中原令中朝文武臣寮凡
數十人隨帳北歸時福進預其行行次鎮州聞戎王已
斃其黨尚據鎮陽遂與李筠白再榮之儔合謀力戰盡
逐契丹據有鎮陽時漢祖已建號于河東詔以福進為

北面行營馬步都虞候尋拜曹州防禦使檢校太保太祖出鎮于鄴將謀北伐奏以福進自隨及太祖入平內難以輔佐功拜忠武軍節度使不數月移領鎮州數年之間北鄙無事及聞太祖將有事于南郊拜章入覲改天平軍節度使加同平章事未及之仕卒于東京之私第年六十有六時顯德元年正月也累贈中書令子繼筠仕皇朝領建武軍節度使卒

劉詞字好謙元城人梁貞明中事故鄴帥枋師厚以勇

悍聞唐莊宗入魏亦列于麾下兩河之戰無不預焉同
光初為効節軍使轉劔直指揮使尋以忤于權臣出為
汝州小校凡畱滯十餘年清泰初詔諸道選驍果以實
禁衛由是得入典禁軍晉初從侯益收汜水關佐楊光
遠平鄴都累遷奉國第一軍都虞候後從馬全節伐安
陸敗淮賊萬餘衆晉祖嘉之授奉國都校累加檢校司
空又從杜重威敗安重榮于京城及圍鎮陽詞自登雲
梯身先士伍以功加檢校司徒沁州刺史時王師方討

襄陽尋命詞兼行營都虞候襄陽平遷本州團練使在
郡歲餘臨事之暇必被甲枕戈而卧人或問之詞曰我
以勇敢而登貴仕不可一日而忘本也若信其溫飽則
筋力有怠將來何以報國也及漢有天下復為奉國右
廂都校遙領閬州防禦使從太祖平鄴加檢校太保乾
祐初李守貞叛于河中太祖征之朝廷以為侍衛步軍
都指揮使遙領寧江軍節度使充行營馬步都虞候命
分屯于河西二年正月守貞遣敢死之士數千夜入其

營皆怖懼不知所為惟詞神氣自若令于軍中曰此小盜耳不足驚也遂免曹橫戈叱短兵以擊之賊衆大敗而退自是守貞喪膽不復有奔突之意河中平太祖嘉之表其功為華州節度使歲餘移鎮邢臺太祖受命加同平章事三年秋改鎮河陽顯德初世宗親征劉崇詞奉命領所部兵隨駕行及高平南遇樊愛能等自北退迴且言官軍已敗止詞不行詞不聽疾驅而北世宗聞而嘉之尋命為隨駕都部署又授河東道行營副部署

其年夏車駕還京授永興軍節度使加兼侍中行京兆
尹二年冬以疾卒于鎮年六十有五贈中書令謚曰忠
惠詞發身軍校亟歷戎事常以忠勇自負洎領藩鎮能
靖恭為治無苛政以撓民謚以忠惠議者躋之子延欽
仕皇朝為控鶴廂使

王進幽州良鄉人少落魄不事生業為人勇悍走及奔
馬嘗聚黨為盜封境患之符彥超為河朔郡守以賂誘
置之左右長興初彥超鎮安州屬部曲王希全搆亂軍

州令進齋變狀聞于朝廷明宗賞其捷足詔隸于軍中
洎契丹內寇戰于膠口進獨追擒六十七人時漢祖總
侍衛親軍知其驍果擢為馬前親校漢祖鎮河東或邊
上警急令進齋封章達于闕下自并至汴不六七日復
焉由是恩撫頗厚繼任戎職累遷至奉國軍都指揮使
從太祖入平內難以功遷虎捷右廂都指揮使歷汝鄭
防禦使亦有政聲俄授相州節度使為政之道頓減于
前議者惜之顯德元年秋以疾卒于任贈檢校太師

史彥超雲州人也性驍獷有膽氣累功至龍捷都指揮使太祖之赴內難彥超以本軍從國初與虎捷都指揮使河徵戍晉州會劉崇與契丹入寇攻圍州城月餘是時本州無帥知州王萬敢不協物情彥超與何徵協力固拒累挫賊鋒攻擊日急禦捍有脩軍政甚嚴居人無擾及朝廷遣樞密使王峻總兵為援寇戎宵遁太祖嘉其善守之功賞賜甚厚未幾授龍捷右廂都指揮使尋授鄭州防禦使劉崇之寇潞州也車駕親征以彥超為

先鋒都指揮使高平之戰先登陷陣以功授華州節度使先鋒如故大軍至河東城下契丹營于忻代之間遙應賊勢詔天雄軍節度使符彥卿率諸將屯忻州以拒之彥卿襲契丹于忻口彥超以先鋒軍追蕃寇離大軍稍遠賊兵伏發為賊所陷世宗痛惜久之詔贈太師示加等也仍命優卹其家焉

史懿字繼美代郡人也本名犯太祖廟諱故改焉考建瑋事唐莊宗為先鋒都校唐書有傳莊宗之伐鎮陽時

建塘為流矢所中而卒懿時年甫弱冠莊宗以其父歿于王事召拜昭德軍使俄遷先鋒左右廂都校俾嗣其家聲天成中為涿州刺史晉初由趙州刺史遷洺州團練使尋歷亳鳳二州防禦使晉祖以其弟翰尚晉國長公主故尤所注意天福中授彰武軍節度觀察畱後開運初歷澶貝二鎮節度使三年移鎮涇原未幾契丹入中原時四方征鎮為戎王所召者靡不虜至惟懿堅壁拒命仍送款于漢祖漢有天下就拜檢校太尉同平章

事及賜功臣名號廣順初加檢校太師兼侍中進封邠

國公顯德元年春以抱病歸朝

東都事畧廷璋傳周太祖常諭廷璋圖涇師

史懿廷璋屏左右示以詔書懿受代入朝遂免禍

途經洛卒于其第年六十二

贈中書令

王令溫字順之瀛州河間人也父迪德州刺史累贈太子太師令溫少以武勇稱初隸唐莊宗麾下稍遷廳直軍校明宗之為統帥嘗與契丹戰于上谷明宗臨陣馬逸為敵所迫令溫乃以所乘馬授明宗而自力戰飛矢

連發敵兵為之稍却及明宗卽位歷遷神武彰聖都校
晉初自淄州刺史遷洺州團練使及安重榮稱兵于鎮
州晉祖以令溫為行營馬軍都指揮使與都帥杜重威
敗賊于宗城以功授亳州防禦使尋拜永清軍節度使
屬契丹來寇時令溫奉詔入朝契丹遂陷貝州其家屬
因没于契丹晉少帝憫之授武勝軍節度使未幾移鎮
延州又遷靈武漢有天下復為永清軍節度使尋改安
州國初加檢校太尉同平章事世宗嗣位遷鎮安軍節

度使罷鎮歸闕顯德三年夏以疾卒時年六十有二詔
贈侍中

周密字德峯應州神武川人也初事後唐武皇為軍職
莊宗之平常山明宗之襲汶陽密皆從征有功莊宗平
梁授鎮州馬軍都指揮使明宗即位累遷河東馬步軍
副都指揮使晉天福初除冀州刺史累官至檢校司徒
入為右羽林統軍檢校太保四年秋授保大軍節度使
檢校太傅屬部民作亂密討平之尋移鎮晉州加檢校

太尉開運中入拜右龍武統軍三年秋出鎮延州其年
冬契丹陷中原延州軍亂立高允權為帥時密據東城
允權據西城相拒久之會漢高祖建義于太原遣使安
撫密乃棄其城奔于太原隨漢祖歸汴父居于闕下廣
順初授太子太師致仕顯德元年春卒時年七十五長
子銳仕皇朝為內職次子廣歷諸衛大將軍

李懷忠字光孝太原晉陽人父海本府軍校懷忠形質
魁壯初事唐莊宗隸于保衛軍夾城之役懷忠率先登

城以功補本軍副兵馬使莊宗平定山東累遷保衛軍使天成中歷陝府許州滄州都指揮使遙領辰州刺史清泰初以河西蕃部寇鈔命懷忠屯方渠晉祖受命以懷忠故人名典禁兵三遷護聖左右廂都指揮使遙領壽州節度使檢校太保未幾為同州節度使檢校太傅少帝嗣位入為右羽林統軍改左武衛上將軍廣順中以太子太傅致仕三年夏卒年六十六詔贈太子太師白文珂字德溫太原人也曾祖辯父君成遼州刺史文

珂初事後唐武皇補河東牙將改遼州副使莊宗嗣位
轉振武都指揮使天成中鎮州節度使王建立表為本
州馬步軍都指揮使遙授舒州刺史檢校司空歷青州
魏府都指揮使歷瀛蔚忻代四州刺史領代州日兼蕃
漢馬步都部署漢高祖鎮并門表為副畱守檢校太保
漢國初建授河中節度使西南面招討使檢校太傅漢
祖定兩京改天平軍節度使加同平章事未幾鎮陝州
檢校太師會河中李守貞叛詔充河中府行營都部署

時文珂已老朝議恐非守貞之敵乃命太祖西征河中
平文珂授西京畱守河南尹太祖踐阼加兼中書令頃
之以太子太師致仕世宗卽位封晉國公顯德元年卒
于西京年七十九輟視朝一日子廷誨仕皇朝歷諸衛
將軍卒

白延遇字希望太原人也幼畜于晉之公宮年十三從
晉祖伐蜀以趨悍見稱晉有天下歷典禁軍累遷至檢
校司空天福中晉祖在鄴安重榮叛于鎮州帥衆數萬

詣闕而來晉祖命杜重威統諸將以禦之時延遇不預
其行乃泣告晉祖願以身先許之及陣于宗城延遇率
其屬先犯之斬級數十戰旣酣而劒亦折諸將由是推
伏晉祖聞之卽命中使以寶劍良馬賜之常山平以功
授檢校司徒充馬軍左廂都校後出為汾州刺史遷復
州防禦使國初加檢校太保尋受代歸闕屬太祖親征
兗海以延遇為先鋒都校兗州平授齊州防禦使歲餘
改兗州防禦使在兗二年為政有聞人甚安之州民數

百詣闕乞立德政碑公頌其美顯德二年冬世宗命宰
臣李穀為淮南道軍都部署乃詔延遇為先鋒都校三
年春帥其所部與韓令坤先入揚州軍聲甚振尋命以
別部屯于盛唐前後敗淮賊萬餘衆四年夏世宗迴自
壽春制以延遇為同州節度使未赴任復命帥衆南征
是年冬以疾卒于濠州城下詔贈太尉

唐景思秦州人也幼以屠狗為業善角觝戲初事偽蜀
為軍校唐同光中莊宗命魏王繼茂帥師伐蜀時景思

以所部戍于固鎮首以其城降于繼炭乃授興州刺史
為貝州行軍司馬屬契丹攻其城因陷于幕庭趙延壽
素知其名令隸于帳下署為所部壕砦使開運末契丹
據中原以景思為亳州防禦使領事之日會草寇數萬
攻圍其城景思悉力以拒之後數日城陷景思挺身而
出使人告于隣郡得援軍數百逐其草寇復有其城毫
民賴是以濟漢初改授鄧州行軍司馬常鬱鬱不得志
後受代歸闕乾祐中命景思為沿淮巡檢使屢挫淮賊

時史弘肇淫刑黷貨多織羅南北富商殺之奪其財大
開告密之門景思部下有僕夫希求無厭雖委曲待之
不滿其心一日拂衣而去見弘肇言景思受淮南厚賂
私貯器械欲為內應弘肇即令親吏殿三十騎往收之
告者謂收吏曰景思多力十夫之敵也見便殺之不然
則無及矣收騎至景思迎接有欲擒之者景思以兩手
抱之大呼曰冤哉景思何罪設若有罪死亦非晚何不
容披雪公等皆丈夫安忍如此都將命釋之引告者面

證景思言受淮南賂景思曰我從人家入並在此若有
十緡貯積亦是受賂言我貯甲仗除官賜外有一事亦
是私貯使者搜索其家惟衣一笥軍籍糧簿而已乃寬
之景思曰使但械繫送我入京先是景思別有紀綱王
知權者在京聞景思被誣乃見史弘肇曰唐景思赤心
為國某服事二十年孝于父母義于朋友被此誣因何
以伸陳某請先下獄願乞追劾景思免至冤橫弘肇愍
之命在獄丁與酒食景思既極就路賴毫之人隨之

京師衆保證之弘肇乃令鞠告事者具伏誣陷即斬之
遂奏釋景思顯德初河東劉崇帥衆來寇世宗親總六
師以禦之及陣于高平景思于世宗馬前距踴數四上
曰願賜臣堅甲一聯以觀臣之効用世宗由是知其名
因以高平陣所得降軍數千人署為効順指揮命景思
董之使于淮上三年春世宗親征淮甸景思繼有軍功
乃命遙領饒州刺史未幾改授濠州行刺史命帥衆攻
圍濠州四年冬因力戰為賊鋒所傷數日而卒世宗甚

卷一百二十四
憫之詔贈武清軍節度使

史臣曰自古為人臣者望重則必危功崇則難保白非
賢者疇能免之況王鄴帥昧明哲之規周太祖乃雄青
之主歟無及禍其可得乎自福進而下皆將帥之英也
擁旌作翰諒亦宜然惟彥超以捍寇而沒可不謂忠乎

舊五代史卷一百二十四攷證

周列傳四王殷傳瀛州人 案歐陽史作大名入

劉詞傳轉劍直指使 案歐陽史作長劍指揮使

贈中書令 案歐陽史作贈侍中据是書則詞以兼侍

中贈中書令非贈侍中也疑歐陽史誤

史彥超傳與龍捷都指揮使何徽戎晉州 案歐陽史

作彥超遷虎捷都指揮使與是書異

史懿傳本名犯太祖廟諱故改焉 案本名二句疑為

後人竄入考史懿名匡懿避太祖御名故去匡字薛
史成于開寶六年不應預稱為太祖或係宋人讀是
書者附注于後遂混入正文也

舊五代史卷一百二十四攷證